

ইউএসএআইডি বাংলাদেশ নবায়নযোগ্য জ্বালানীর জন্য গ্রামীণ শক্তিকে নতুন অনুদান দিয়েছে

ঢাকা, ২৩শে আগস্ট, ২০০৫ -- যুক্তরাষ্ট্র আন্তর্জাতিক উন্নয়ন সংস্থা (ইউএসএআইডি) নবায়নযোগ্য সৌরশক্তি ব্যবহারের প্রযুক্তি ক্ষেত্রে মানব সম্পদ উন্নয়নের জন্য গ্রামীণ শক্তিকে ১২ লাখ ডলারের একটি অনুদান দিয়েছে। গ্রামীণ শক্তি গ্রামীণ পরিবারের সদস্য। আজ (২৩শে আগস্ট) গ্রামীণ ব্যাংক ভবনে ইউএসএআইডি বাংলাদেশ এবং গ্রামীণ শক্তির মধ্যে এই মর্মে একটি চুক্তি স্বাক্ষরিত হয়। চুক্তি স্বাক্ষর অনুষ্ঠানে ইউএসএআইডি মিশনের ভারপ্রাপ্ত পরিচালক মীজ বেথ পেইজ এবং গ্রামীণ শক্তির চেয়ারম্যান প্রফেসর ড: মোহাম্মদ ইউনুস উপস্থিত ছিলেন।

ইউএসএআইডি বাংলাদেশ ২০০০ সালে পাঁচ বছর মেয়াদে বিদ্যুৎ গ্রিডের বাইরে গ্রামাঞ্চলে ঘরবাড়িতে সৌরশক্তি ব্যবহারের উপকরণ প্রতিষ্ঠাপনের উদ্দেশ্যে গ্রামীণ শক্তিকে ৪০ লাখ ডলারের একটি অনুদান দেয়। ইউএসএআইডি'র এই পাইলট প্রকল্পের অধীনে গ্রামীণ শক্তি বাংলাদেশের বিভিন্ন অংশে সাফল্যের সংগে সৌরশক্তির ৩৮,৫০০ টি প্ল্যান্ট স্থাপন করে। এই প্রচেষ্টা বাংলাদেশে সৌরশক্তি ব্যবহারের উপযুক্ততা প্রমাণ করেছে এবং তা অন্যান্য দাতা সংস্থাকে এই কর্মসূচীতে সহায়তা দিতে উৎসাহিত করেছে। এই সব প্রত্যন্ত অঞ্চলে গ্রামীণ শক্তির মাধ্যমে নবায়নযোগ্য সৌরশক্তি একটি নির্ভরযোগ্য, সাশ্রয়ী ও পরিবেশবান্ধব জ্বালানী ব্যবহারের সুযোগ করে দিয়েছে।

গ্রামীণ শক্তির নতুন অনুদানটির লক্ষ্য আরো প্রসারিত। অনুদানের অর্থ গ্রামাঞ্চলে প্রান্তিক গোষ্ঠীগুলো, বিশেষকরে মহিলা ও যুবকদের নবায়নযোগ্য জ্বালানী খাতে দক্ষ করে তোলা এবং অর্থনৈতিক সুযোগ সম্প্রসারণের মাধ্যমে তাদের ক্ষমতায়নে ব্যবহার করা হবে। গ্রামাঞ্চলে প্রযুক্তি কেন্দ্র স্থাপন করা হবে। এই কেন্দ্রগুলো সৌরশক্তির প্রযুক্তি ব্যবহারে মহিলাদের দক্ষতা বৃদ্ধি করা, গ্রাম পর্যায়ে মহিলাদের কর্মসংস্থানের সুযোগ সৃষ্টি করা এবং শৈশবেই ছাত্রছাত্রীদের এই প্রযুক্তি সম্পর্কে সচেতন করার ওপর গুরুত্ব দেবে।

ইউএসএআইডি'র রিজিওনাল কনট্রাক্টিং অফিসার যোশেফ ম্যার্কিং এবং গ্রামীণ শক্তির জেনারেল ম্যানেজার আবসার কামাল নিজ নিজ সংস্থার পক্ষে চুক্তিতে স্বাক্ষর করেন।

=====

জিআর/ ২০০৫

দ্রষ্টব্য: এই নিবন্ধের ইংরেজি ভাষ্য ‘আমেরিকান সেন্টার’-এ পাওয়া যাবে। যদি আপনি ইংরেজি ভাষাটি পেতে অসহায় হন, তবে ‘আমেরিকান সেন্টার’ প্রেস সেকশনে (টেলিফোন: ৮৮১৩৮৮০-৮, ফ্যাক্স: ৯৮৮৫৬৪৪; ই-মেইল: DhakaPA@state.gov এবং Website: dhaka.usembassy.gov (New) এ যোগাযোগ করুন।